



REPUBLIKA E KOSOVËS/REPUBLIKA KOSOVA

GJYKATA THEMELORE PEJË - DEGA E GJYKATËS ISTOG

Numri i lëndës: 2023:062388

Datë: 28.03.2024

Numri i dokumentit: 05516587

C.nr.369/23

GJYKATA THEMELORE NË PEJË- DEGA ISTOG, Departamenti i Përgjithshëm - Divizioni për Çështje Civile, me gjyqtaren Lirika Sylaj, në çështjen juridike kontestimore të paditëses M.A nga fshati R., Komuna e I. , të cilën sipas autorizimit e përfaqëson Blerim Ademaj avokat në Pejë me adresë në rrugën “Hoxhë Tasini” nr.34, kundër të Komuna e Istogut - Drejtoria Komunale e Arsimit, sipas objektit të kontestit kompensim i shpenzimeve të ushqimit – shujtave ditore, shpenzimeve të udhëtimit dhe mbi bazën e inflacionit, jashtë seancës gjyqësore, me datë 28.03.2024, merr këtë:

A K T G J Y K I M

për shkak të pa dëgjueshmërisë – mosbindjes

I. APROVOHET si e bazuar kërkesëpadia e paditëses M.A ashtu që, DETYROHET e paditura Komuna e Istogut - Drejtoria Komunale e Arsimit që paditëses t’ia kompensojë shumat si në vijim:

- në emër të kompensimit për ushqim - shujtave ditore, për 76 ditë nga 2 (dy) euro për secilën ditë të prezencës në punë, duke e llogaritur prej datës 04.03.2021 deri me datën 02.07.2021, shumën në lartësi prej 152 Euro,
- në emër të shpenzimeve të udhëtimit për 76 ditë, për 70% të këtyre shpenzimeve në shumën prej 106.40 Euro, si dhe
- në emër të kompensimit për inflacion 4 muaj të vitit 2021, t’ia paguaj shumën prej 57.24 Euro, të gjitha këto në shumën e përgjithshme prej 315.64 Euro me kamatë ligjore 8% në vit, nga data 09.03.2023, e deri në pagesën definitive të detyrimit, të gjitha këto në afat prej 7 ditësh nga dita e pranimit të këtij aktgjykimi, nën kërcënim të përmbarrimit të detyrueshëm.

II. DETYROHET e paditura Komuna e Istogut - Drejtoria Komunale e Arsimit, t’ia paguaj paditëses shpenzimet e procedurale në shumë të përgjithshme prej 125 €, në afat prej 7 ditësh nga dita e pranimit të këtij aktgjykimit, nën kërcënim të përmbarrimit të detyrueshëm.

A r s y e t i m

Paditësja, përmes të autorizuarit të saj ka parashtruar padi në këtë gjykatë me datë 09.03.2023, kundër të paditurës Komuna e Istogut - Drejtoria Komunale e Arsimit, kompensimin e shpenzimeve të ushqimit – shujtave ditore, shpenzimeve të udhëtimit dhe mbi bazën e inflacionit.

Gjykata në këtë çështje juridike kontestimore pas shqyrtimit paraprak të padisë ka nxjerrë aktvendimin për përgjigje në padi me datë 08.11.2023, të cilin e paditura e ka pranuar me datë 16.11.2023 (*e cila është konfirmuar përmes fletë kthesës, e cila gjendet në shkresat e lëndës*).

Me aktvendimin për përgjigje në padi, gjykata e ka njoftuar të paditurën për detyrimin ligjor për dhënie të përgjigjes në padi dhe për pasojat ligjore që do t'i ketë nëse nuk paraqet përgjigje në padi, gjegjësisht për mundësinë që gjykata të marrë aktgjykim për shkak të mosbindjes - pa dëgjueshmërisë.

E paditura, pavarësisht se e ka pranuar aktvendimin për përgjigje në padi, së bashku me padinë dhe provat materiale në këtë çështje juridike kontestuese, nuk ka paraqitur përgjigje në padi brenda afatit ligjor.

Gjykata, pasi i ka vlerësuar kushtet ligjore për nxjerrjen e aktgjykimit për shkak të mosbindjes, ka gjetur së në rastin konkret plotësohen të gjitha kushtet ligjore për nxjerrjen e aktgjykimit në fjalë nga neni 150 paragrafi 1 pikat a), b) dhe (c) të LPK-së, nëse të paditurit i është dorëzuar padia dhe thirrja për përgjigje në padi, se themelësia e kërkesëpadisë del nga faktet e treguara në padi dhe se faktet në të cilat mbështetet kërkesëpadia nuk janë në kundërshtim me provat që i ka propozuar vetë paditësi apo me faktet e ditura botërisht.

Themelësia e kërkesëpadisë për paditësen M.A del nga provat të cilat gjenden në shkresat e lëndës, konkretisht nga: kontrata me numër të protokollit 85/21 e datës 05.03.2021 e lidhur në mes paditëses dhe të paditurës nga e cila vërtetohet se paditësja është në marrëdhënie pune te e paditura si edukatore për parafillor në institucionin arsimor “Mehmet Akif” në Shushicë, vërtetimi me numër të protokollit 62/23 i datës 21.02.2023 nga i cili vërtetohet vijueshmëria në punë e paditëses nga data 04.03.2021 e deri më datën 02.07.2021, ditë për të cilat paditësja kërkon kompensimin e udhëtimit për ditët e pranisë në punë dhe shujtave të ushqimit gjithsejtë për 76 ditë, vërtetimi dhe tiketat/biletat e lëshuara nga kompania e udhëtimit “Çatia 99” nga të cilat vërtetohet çmimi kushtues i biletës së udhëtimit për relacionin që e bënë paditësja.

Gjykata ka vendosur ta aprovojë kërkesëpadinë e paditëses, që të ia kompensoj diferencën e pa paguar në pagë, referuar normës së inflacionit për vitin 2021 duke u bazuar në dispozitat e nenit 35, pika 10 të Kontratës Kolektive të Arsimit në Kosovë të datës 18.04.2017 si dhe Kontratës Kolektive të Arsimit në Kosovë e datës 22.01.2021, që parashihet se “*Për çdo vit të përcillet shkalla e inflacionit në bazë të Entit të Statistikave të Republikës së Kosovës*”.

Sa i përket shkallës së inflacionit nëpër vite, gjykata vendosi si më lartë duke u bazuar konform tabelës së inflacionit të lëshuar nga parashtesa e Agjencionit të Statistikave të Kosovës, me numër 01-02-1436, të datës 27.10.2023.

Gjykata është bazuar në mendimin juridik të miratuar në Seancën e Përgjithshme të Gjykatës Supreme, të datës 09 tetor 2023 në cilin parashihet se “*Punëtorët në bazë të Kontratës Kolektive të Arsimit në Kosovë të datës 18.04.2017 dhe Kontratës Kolektive të Arsimit në Kosovë të datës 22.01.2021, kanë të drejtë që në pagën e tyre të futet përqindja e inflacionit, marrë për bazë shkallën e inflacionit çdo vit Sipas Entit të Statistikave të Republikës së Kosovës*”, ashtu siç është përcaktuar me nenin 35, pika 10 të këtyre marrëveshjeve”.

Gjykata përveç kërkesës kryesore në dispozitivin I të këtij aktgjykimi, ka vendosur edhe për kamatën ligjore, duke u mbështetur në dispozitën e nenit 382 të LMD-së dhe Mendimit Juridik të Gjykatës Supreme të Kosovës për nr.265/2020 të datës 01.12.2020, ashtu që ka marr datën e

ushtrimit të padisë (data 09.03.2023), e ku lartësia e kamatës vjetor është e definuar 8% deri në pagesën definitive.

Vendimin që pala e paditur ti bartë shpenzimet e procedurës, gjykata e ka mbështetur në dispozitat e nenit 449 dhe 452 të LPK-së, ndërsa sa i përket lartësisë së shpenzimeve të procedurës u bazua në nr. tarifor 6 të Rregullorës për Tarifën e Avokatëve të Kosovës ashtu që lartësia e shpenzimeve të aprovuara i referohet 104 euro për përpilim të padisë dhe 21 euro për taksë gjyqësore.

Gjykata, vendosi si në dispozitiv të këtij aktgjykimi duke i'u referuar dispozitës së nenit 150 par.1 pika a, b, dhe c të LPK-së, e në lidhje më dispozitat e nenit 35 paragrafi 5, 7 dhe 10, të Kontratës Kolektive të Arsimit të datës 18.04.2017 dhe 22.01.2021, dhe dispozitave të nenit 245 par.1 dhe 2, neni 249 paragrafi 1 dhe 2 të LMD-së.

GJYKATA THEMELORE NË PEJË - DEGA ISTOG,
Departamenti i Përgjithshëm-Divizioni për Çështje Civile
C.nr.369/23 data 28.03.2024

Gj y q t a r j a
Lirika SYLAJ

KËSHILLË JURIDIKE: Kundër këtij Aktgjykimi pala e pakënaqur ka të drejtë ankese në afat prej 7 (shtatë) ditësh nga dita e pranimit, Gjykatës së Apelit, nëpërmjet të kësaj Gjykate.